

EYEN-AÑWAN KE MBEN OBUBE MMỌN

John 4:1-42

ỌYỌHỌ UKPEP-ŊKPỌ 30

Eke Mkparawa

IKỌ IBUOT: “Ndien mbufo eyekot mmọn ke idaresit ke mme obube mmọn erinyaña”
(Isaiah 12:3)

Samaria

Jesus kpukpru ini esidiọnọ ebiet emi mbon akpanikọ emi edikpañde utọn enọ ukwọrọ ikọ Esie edude. Okposuk edi usuñ ekekperede, mme Jew ikesisañake ke Samaria ibe ke ini mmọ etode ke Jerusalem eka Galilee, koro mmọ ekesuade mbon Samaria. Ke ata ediwak isua emi ekebede, ke ini eketañde mme Jew nte mbuot ekọn enyọn, ema eda mme ete-ete mbon Samaria eka man ekeduñ ke obio mmọ; ndien ke akpanikọ, mme Jew ikenemke esit ye mmọ. Mbon Samaria ekedi mme okpono ndem, ndien ke ini afanikọn osimde mmọ, mmọ ekere ete mme abasi isọn oro eyaresit, ke ntre, mmọ esikot mme oku mme Jew ete ekpep mmọ ebaña ata Abasi. Nte-ededi, mmọ ikeneñekere ikpọn ido ukpono mmọ, ke ntre, mme Jew ekeda mmọ nte mmọ eke edehede.

Edi Jesus ama ọfiọk ete ke owo kiet mmọdo ke Samaria emi ediyerede ikot Gospel, ke ntre, “Enye ekenyene ndisaña mbe ke Samaria.” Ndusuk ini, nnyin imesikop nte edọhọde ete ke Abasi eyenyeñe enyọn ye isọn man anyaña ukpọn kiet, emi owut nte Enye ekerede ńkpọ abaña erinyaña ukpọn nnyin.

Nnyin imeti nte Philip ekenimde mboho eridemere ke Jerusalem ini kiet. Edi akpanikọ nte ke ediwak owo ema odu ke mme mboho oro; edi kpa ke ufọt ini mboho oro, Abasi ọdọhọ Philip ete ọsuhọre aka ke desert emi odude ke Gaza. Eketie nte edi esen ewuhọ, edi Abasi ama okut ete ke Philip eyesobo ye owo do emi oyomde erinyaña ukpọn. Philip ama osobo ye eunuch owo Ethiopia, onyũ ekpep enye usuñ nte edikutde Jesus. Ntem ke enye akada ukpọn efen ọnọ Christ.

Jesus Ke Obube Mmọn Jacob

Jesus ye mbet Esie ema esaña ediwak ibat itiat mbemiso mmọ edisim obube mmọn Jacob, ndien udia isañ mmọ ama ekure. Ke ini mbet ema ekeka ke obio ndidep udia, Jesus ama osuhọre etie ke mben obube mmọn ọduọk odudu. Nte ima ikekpep ke ibuot ukpep-ńkpọ emi ama ekebe, ibat-ibat obube mmọn emi ekedude ke obio emi okofiopde onyũ asatde ntre ekedi inyene eke mikenyeneken eke ọm-urua, okonyũ edi ata akpan-ńkpọ emi omumde uwem akama. Jesus akada emi nte ibuot ikọ ke ini Enye ama ọkọkọm ńwan emi okotode ke esit obio edi ndikoi mmọn ke ini Enye osuk ọduọkde odudu do.

Ke Jesus ama ọkọtọnọ nneme Esie oto ke ndiyom uñwam nto enye, Enye owut ete ke Imọ ikekereke ite ke Imọ imọfọn ikaha nditiñ ikọ ye enye. Akananam ńkpọ ndomo kiet iduhe emi Christ midioñọke. Akanam idiọk-owo iduhe emi idiọk-ńkpọ esie okponde akan nte Christ okopde eseme esie onyũ atua mbọm. Ke otu mme mfina nnyin, ndomo kiet iduhe emi ekpride akan Enye ndikere nnyũ ńñwam nnyin ndimen mfep. Jesus ama ọdọhọ mbet Esie ete: “Nte inyamke ńkpri inuen iba ke obubit okuk kiet? Ndien baba mmọ kiet iduọhọ ke isọn ke mitoho Ete mbufo. . . Ekufehe ndien; mbufo emesọn urua ekan ediwak ńkpri inuen” (Matthew 10:29, 31). Jesus okoduñ ke otu mme ubuene emi ekesikopde ikọ Esie ye idaresit; onyũ esidia udia ye mme publican ndien mme Jew esin Enye ke ndek. Jesus ọdiọnọ se idude ke esit, ndien edieke Enye okutde udọn do ke abaña akpanikọ, owo ndomo kiet isuhokere inyũ ikprike ikan nte Enye añwamde. “Koro owo esede enyin, edi Jehovah ese esit” (1 Samuel 16:7).

Odu Uwem Mmọn

Idahemi ndien, Jesus enyene ufañ ndineme mbaña Odu Uwem Mmọn emi Enye ekenyenede ndinọ. Ediwak ini, ke ukpep-ńkpọ Ikọ Abasi, esida Spirit Abasi edomo ye Odu-Uwem Mmọn, ndien nnyin imokot ibaña akwa usen usọrọ nte Jesus akadade ofiori “Edieke owo ekededi okopde nsat-itọn, yak enye etiene Mi edinwọn. Owo eke ọbuọtde idem ye Ami. . . akpa odu-uwem mmọn eyeto enye ke idem ọwọrọ” (John 7:37, 28). Mi, Enye eketiñ abaña Spirit Abasi emi edinyenede kpukpru mme andinim ke akpanikọ ke ini ema ekenyaña enye, oro eyeyọhọ ọduọi man oto do kpukpru owo ekeme ndikut ete ke enye okodu ye Jesus onyũ ekpep oto Enye.

Ñwan Samaria emi ikọfiọkke se Jesus eketiñde. Edi akpanikọ, baba owo kiet iduhe emi okponde akan Jacob emi okotibide obube emi ọkọtuñọde osim itiat ebe oduk isọn ke ikpat 105 emi ekekoidede mmọn ke ńkpọ nte isua 2,000!. Edi okposuk edi nte obube mmọn oro ọkọsọñde urua, enye ekesisuk nsat-itọn ke ibio ini. Akana nte efiak edikoi ke ini ke ini.

Ke ini Jesus ọkọdọhọde nwan oro ete ke enye idikopke nsat-itọn aba ke enye ọnwọnde mmọn emi Imọ idinọde, enye ama oyom. Eyenam mbiomo esie efere eti eti ke enye nditre ndisaña anyan usuñ oro ndikoi mmọn. Edi Jesus eketiñ abañ mme nkpo eke okponde akan mmọn, ndien enye ama akpan utọn onyụn onyime.

Ediwak ini, mme owo edi ebine Jesus eyom mme eridiọn uwem emi, oro edi, erikok udọn ikpohidem, ye mme uñwam efen, edi mmọ idimaha ndisana mme idiok-nkpọ mmọ nyak. Ke ini otu owo ekekande Jesus ekuk ke Enye ama ọkọbọk tọsin owo ition, Enye ọdọhọ mmọ ete ke idighe ke ntak ikọ emi Imọ iketiñde esin mmọ etiene Imọ, edi koro mmọ eketade uyo ye iyak. Nnyin imokut ediwak mme owo eke etiede ntem mfin.

Se Ekpenimde Ke Akpanikọ

Ke ini Jesus ọkọtọhọde ndiyarare mme idiok-nkpọ ke uwem añwan Samaria, enye ikafañake. Enye ama ọdiọn ete ke Enye ekedi Anditiñ-ntiñ-nnim-ikọ, ndien mme mbume ema edu ke esit esie ke abañ ikọ Abasi emi enye okobupde Enye oyom iborọ. Mme Jew ekedọhọ ete ke Jerusalem edi itie ndikpono Abasi, edi mbon Samaria ema ebọp itie ukpono ke obot Gerizim. Mme anie enen? Nte mmọ ikokponoke ukem Abasi kiet oro?

Mfin emi, ediwak ini, mme owo esibup ete, “Ndikeme didie ndidiọn ufok Abasi emi ọfonde? Ediwak nsio nsio ukpep-nkpọ edu, ndien mmọ kiet kiet ebat ete ke ọfon.” Jesus anam awañ enye se idide eti ido ukpono. Erinyaña ekenyene mme Jew koro toto ke ini Abraham, mmọ ekedi mmọ emi Abasi ekemekde, ndien Enye ama ọnwọn ete ke edito ke mmọ mme idut ererimbot ekut mfon. Jesus ekedi uyọhọ ntiñ-nnim ikọ oro, ndien mi, akana nte Enye ọdiọn kpa mbon Samaria nko. **Itie ukpono** emi mme owo ekekponode Abasi ikedighe nkpo nte **ido** emi mmọ ekedade etoro Enye; mmọ enyene ndituak ibuot nnọ Enye “ke Spirit ye ke akpanikọ.”

Ini kiet, Abasi ama etiñ abañ nditọ Israel ete “koro mbio-obio emi etienede Mi ke inua mmọ, enyụn ekponode Mi ke mkpok-inua mmọ, edi esit mmọ ada nsan-nsan ye Ami” (Isaiah 29:13). Ekem ndien Jesus ada kpa ukem ikọ emi etiñ ye mme Jew ete: “Edi mmọ ekpono Mi ikpikpu sia ekpepde item owo ke ukpep-nkpọ mmọ” (Mark 7:6, 7). Abasi oyom nditọ Esie ndimenere ke enyọn “ndisana ubok, emi ifiopesit ye eyihe miduhe.” Ana nte mmọ ekpono Enye ke “ndisana ubok, ye ke ndisana esit.” **Ifet** iduhe inọ idiok-nkpọ ke uwem owo emi edide anditiene Jesus. Ke ini enyañade enyụn eyetde owo asana, enye enyene edisana esit oro.

Nwan oro ke obube mmọn ama okop ete ke Messiah enyene ndidi, ndien etie nte enye ama onim ke akpanikọ ete ke mme eridiọn Esie enyene kpukpru owo, koro enye ọkọdọhọde ete, “Ke ini enye edide, Enye eyeñwāñade kpukpru nkpo ọnọ **nnyin**.”

Mfina emi ediwak owo enyenede edi ke mmọ iyomke etiñ “kpukpru nkpo” enọ mmọ. Mmọ iyomke Jesus ayarare mme idiok-nkpọ mmọ. Edi nwan emi ama oyom ndidiọn mme idiok-nkpọ esie koro enye ama ọfiok ete Jesus edi Christ, Enye emi enyenede ndidi.

Nwan Emi Ekedide Ọkworọ Ikọ

Ke ini Jesus ama ọkọkpuhọre uwem esie, enye ama oyom mbon efen ediọn ebaña. Oro edi eti idiọn emi owutde nnen-nnen nkabare esit. Ke Jesus anyañade ukpọn nnyin, onyụn anam nnyin ikop inemesit, nnyin iyom mbon efen ekop man mmọ nko ekpenyene idaresit. Ediwak mme owo ema enim se nwan oro eketiñde ke akpanikọ, enyụn ewọn ete ke obube mmọn ndise Jesus. Ke mmọ ema ekekop se Enye eketiñde, mmọ ema edọhọ ete, “Ke emi nnyin imonim ke akpanikọ, idighe koro afo eketiñde, edi koro nnyin ima ikokop ke idem nnyin, inyụn ifiok ite, Owo emi edi Andiyaña ererimbot ke akpanikọ.” Owo kiet kiet ekeme ndidiọn Jesus ke idem esie, oro idighe ndifiok mbaña Enye, edi owo ndidiọn Enye ke idem esie ikpọn nnyụn ndu uwem ndinem Enye esit ke usen ke usen.

Mbon Samaria emi ema ema Jesus ndien edọhọ Enye ete etie ye mme imọ. Ndien Enye ama ọsuhọ ye mmọ ke usen iba. Mmọ ekenyene ukpuhọre adaña didie ye mbon Gadarene emi ke otu mmọ Jesus ọkọkọkde owo emi ekenyenede ndidehe spirit. Mbon Gadarene ekekepe Enye ubok ete ọkpọn obio mme imọ, oro edi, Jesus emi akanamde utọ utibe utom mfonido oro ọnọ owo mmọ kiet!

Ama afina mbet koro ete ufok mmọ mikadiaha udia, edi Enye ama ọdọhọ mmọ ete ke udia Imọ edi ndinam uduak Ete Imọ, oro edi, nditiñ nnọ mme owo usuñ nte mmọ ekemede ndiworọ ke idiok-nkpọ mmọ. Uduak eridi Esie ke ererimbot ekedi ndifak iban ye iren nnọ Abasi, man oto do mmọ ekpebeñe idem ndika Heaven.

Mbon Utom Iwakke

Ediwak ini, imesikop nte edọhọde ete, “ke akpanikọ idok okpon, edi mme anam utom iwakke’ emi ọwọrọde ete, ediwak ukpọn mmọdo emi anade nte enyaña, edi ata ekpri ibat Anditiene Christ emi emumde idaha Eti-mbuk ekama, emi enyụn ebeñede idem ndituk idem mmọ, nsin inemesit uwem emi man enam nkpo enọ Jesus edu. Ndisuan eti etop erinyaña akpana edi ata akpan nkpo ọnọ nnyin akan ndidia udia obukidem nnyin. Ke ini nnyin idiade udia, nnyin itọn ntak ikop biọn usọp-usọp, edi utom emi inamde inọ Jesus eyenọ nnyin utip eke ebighide ọsufọ ke nsinsi uwem.

MME MBUME

- 1 Emekere ete enyene ntak emi Jesus akasaañade ke Samaria ebe?
- 2 Ewe enyiñ ita ke ñwan oro ọkọnọ Christ?
- 3 Nte Christ ama etiñ ọnọ enye Enye emi Imọ idide?
- 4 Nte mbon obio oro ema enim ikọ ntiense esie?
- 5 Nso ñkpọ ke uwem Christ okokpon akan ata udia ikpọhidem?